

## Pol da Timoti do Papia 2 Mandagit

*But piso gen*

Timoti unjun Pol dakon pi isalni, do Pol da papia on anpak tagisi yolek asak unjun do mandagit. Pol dam tebanon egek kili nikba kimotdisat yan nandanek Timoti nandan gadatni dima yawotjak, ae Yesu Kristo dakon Gen Bin Tagisi do yan tenjenok pi dima yipmandetjak do mandagit. Ae Pinjkop dakon gen morap tagisi guramik kimotjak do iyigit. Amin da tepmi jigiyu madepsi imdan, mani tebaisi agek Pinjkop da pi imgut unjun an kimotjak do mandan imgut.

Timoti amin nandak nandakni gulusun ton amin dakon gen do mirak dima yopjak do iyigit. Unjuden gen da amin mirak pan yoman amin dakon egip egip panupbal an. Do Timoti Pol dakon anpak tagisi timigek unjun ban yol kimotjak. Unjun nandan gadaron tebaisi agek buri yaworisi tanakwa ae amin do but dasi galak tan yominek jigi mibili mibili unjun guramitjak do iyigit.

*Timoti Pinjkop dakon amin dagok do pi tebaisi asak*

<sup>1</sup> Nak Pol, Yesu Kristo dakon yabekbini. Iyi da galak togon Pinjkop da nak yabekbi pi aben, ae Yesu Kristo nandan gadan iman amin egip egip unjun yom do yan teban tok an yomgut unjun do yoyiken do nak tilak agit.

<sup>2</sup> Timoti monji gimano nak on papia gak do mandan gamisat. Pinjkop Dat ae Amin Taginin Yesu Kristo dakon nandan yawotni gat, ae bupmini gat, ae but yawotni gat gagon tosak do bisit asat.

*Gen Bin Tagisi do mayaktok dima panen*

<sup>3</sup> Babikno Piŋkop da dabilon gulusuŋnin mini yaŋsi nandaŋek Piŋkop dakon pi awit, nakyō kisi yaŋ giŋ pini asat. Kalbi ae gildari yipmaŋ deri mini bisit aŋek gak do nandaŋek Piŋkop ya yaŋ iyisat. <sup>4</sup> Dabilgo dakon pakbi mawit, nak uŋun do nandaŋek abiŋ aeno gandakdosi nandisat, aŋek but galaksi nandakeŋ.

<sup>5</sup> Nak nandisat, kalip uwago Lois ae meŋgo Yunis da nandaŋ gadat agimal, gakyō kisi yaŋ giŋ Kristo nandaŋ gadaŋ imiŋ kimokdol yaŋsi nandisat. Aŋek gak dakon nandaŋ gadakgo tebai uŋun do nandaŋek, <sup>6</sup> nandak nandakgo abo pisaŋban Piŋkop da but galak do wup dakon yo uŋun gamgut abi egip egipgokon aeni teban tosak do nandisat. Uŋun amin da kindap pisaŋakwa madepsi sosōŋ uŋun da tilak. Kisitno busuŋgokon wutjigim bisapmon Piŋkop da but galak do tapmim gamgut uŋun do yosot. <sup>7</sup> Abi madepsi sosak, nido Telagi Wup nimgut uŋun pasol pasol aneŋ do dima nandisak. Uŋun da tapmim nimisak, ae nin paŋpulugaŋban amin do but dasi galak taŋ yomamaŋ, ae nin do kila aŋek aŋpak kalipmi pabiŋ yopmaŋgamaŋ.

<sup>8</sup> Do gak Amin Taginin dakon gen yaŋ teŋteŋok do mayaktok dima pabi. Ae nak Yesu dakon dam tebanon amini nak do mayaktok dima pabi. Piŋkop dakon tapmim abidaŋbi Gen Bin Tagisi yaŋ teŋteŋok pikon nak gat kisi jigi pandeŋ. <sup>9</sup> Piŋkop da nin yokwikon baŋ timigek telagisi egipneŋ do yaŋ nimgut. Nin da aŋpak tagi kindā agimaŋ do aŋek dima, nandaŋ yawotni do aŋek yaŋ nimgut. Kalipsigwan yo kindā dima wasaŋban noman taŋakwan, Yesu Kristo do aŋek nandaŋ yawotni nim do kili nandaban teban tagit. <sup>10</sup> Ae abisok Yesu Kristo yokwikon baŋ timit timit aminin noman kili altaŋ teŋteŋaŋban Piŋkop dakon

1:3: Ya 23.1  
2.8-9; Tit 3.5

1:5: Ya 16.1  
1:10: Ibr 2.14

1:6: 1Ti 4.14

1:7: Ro 8.15

1:9: Ep

nandan yawotni kisi noman altan tetenagait. Yesu Kristo da kimot dakon tapmim aban pasilgit, anek Gen Bin Tagisi da pantagap aban minat amin morap kisi egip egip teban do nandaba pisagit. <sup>11</sup> Pinjkop da nak unun Gen Bin Tagisi dakon yan tetenok anek yabekbi pi anek yoyindet pi aberj do manjigit.

<sup>12</sup> Mibili yan do jigai unun guramikdat. Mani unun do mayagi dima pasat, nido amin unun nandan gadaj imisat unun kili nandan imgum. Ae nak da kisitnikon yo yipgum unun kilani tagisi anekwan wigi Kristo apjak Gildaron wugisak yansi nandan kimokdot.

<sup>13</sup> Gen tagisi gamgum unun tebaisi abidanej minat aminyo yoyin dekgi. Anek Yesu Kristokon gadanej nandan gadat bamisi anek amin do but dasi galak tan yobi. <sup>14</sup> Pinjkop da Gen Bin Tagisi kilani abi do gamgut, unun kilani tagisi an kimokgi. Telagi Wup nin da butgwan yikdak unun da gak pi unun do tagi anpulugosak.

<sup>15</sup> Gak nandisal, Esia provinskon amin morap nak kili nepman dekgwit. Ae Pigelus gat ae Emogenes kisi nak kili nepman dekgimal.

<sup>16</sup> Nak Onesiporus dakon gwakni Amin Tagi da bupmi nandan yomjak dosi nandisat. Bisap morapmi Onesiporus da nak dakon but anteban aban butno tagisisi agit. Ae dam tebanon yikgim unun do mayagi dima pagit. <sup>17</sup> Unun Rom abinej nak nandak do pi madepsi anek wisigit anek don nak nandagit. <sup>18</sup> Ae kokup pap Epesaskon unun da nak madepsi anpulugagit unun gaga pakyansi nandisal. Gen kokwin bisap madepmon Amin Tagi da bupmi nandan imjak dosi nandisat.

## 2

*Timoti Yesu Kristo dakon emat amin tagisi da egipjak*

<sup>1</sup> Monjino, Yesu Kristo dakon nandaŋ yawotni da gak aŋteban aŋakwan tebaisi akgi. <sup>2</sup> Aŋek gen morap amin morapmi da dabilon yaŋ teŋteŋaŋapbo nandagil, uŋun Piŋkop gen tebaisi abidoŋ amin do yobi. Aŋaki uŋun da amin diwari kisi tagi yoyiŋdetni. <sup>3</sup> Gak Yesu Kristo dakon emat amin tagisi da egek pi uŋun dakon jigi pabi, amin diwari nin gat kisi da paner. <sup>4</sup> Emat amin pi aŋ bisapmon, pi di gat kisi dima aŋ. Uŋun mibiltok amin madepni da pi agakni pindakban kilegisi asak do nandisak. <sup>5</sup> Napbi gwapbokon kisak amin napbi gwapbo dakon gen teban kisi yoldak. Yaŋ dima asak kaŋ, napbi gwapbokon teban tarjek tomni abidoŋ, uŋun dima abidosak. <sup>6</sup> Amin kinda jap do pi madep aŋek kilani tebaisi asak amin, uŋun da amin diwari mibiltar yomiŋek pigaga jap pasak. <sup>7</sup> Geno on yosot uŋun do nandaki, aŋaki Amin Tagi da nandak nandakgo aban piŋarban gen morap uŋun dakon mibili nandabi pisokdisak.

<sup>8</sup> Gak toktogisi Yesu Kristo do nandaki. Uŋun Kila Amin Madep Dewit da kabikon nani, uŋun kimagek aeni pidagit. Nak Gen Bin Tagisi on nar yaŋ teŋteŋosot. <sup>9</sup> Gen Bin Tagisi uŋun yaŋ teŋteŋaŋapbo mibili uŋun do nak jigi mibili mibili paŋek yokwi pakpak kinda nar yaŋ kisit kandapyono nap teban nar paŋteban abi. Mani Piŋkop dakon geni uŋun nap teban nar aripmi dima aŋteban agagi. <sup>10</sup> Yaŋdo, nak Piŋkop dakon miŋat aminyo iyi do manjigit paŋpulugoker do butno aŋteban aŋek uŋun jigi morap pasat. Nak Yesu Kristo da yokwikon nar timitjak do nandisat, ae uŋun gat kisi toktogisi tilimnikon egi wigini do nandisat.

<sup>11</sup> Gen on uŋun bamisi:

---

2:3: 2Ti 1.8      2:5: 2Ti 4.8      2:6: 1Ko 9.7      2:8: Ro 1.3; 1Ko 15.4  
 2:9: Ep 3.1,13; Pil 1.12-14      2:11: 2Ko 4.11

Nin uñun gat kisi kalonji kimakgimanj kañ,  
nín uñun gat kalonji egipdamanj.

<sup>12</sup> Nin tebai agek jigi morap uñun guramitneñ kañ,  
nín uñun gat kisi kila amin madep egipdamanj.

Nin manji imneñ kañ,  
uñun yo kisi manji nimdisak.

<sup>13</sup> Nin yañ teban tok genin yapneñ kañ,  
uñun geni guramitdisak gin,

nido iyi dakon geni kulabik aripmi dima asak.

*Timoti Pinjkop dakon pi aminsi dagok do pi tebaisi asak*

<sup>14</sup> Gak bisapmi bisapmi miñat aminyo pañpuluganbi gen uñun do nandani. Uñun gen emat añek gen dakon mibili do notni pabiñ yop do pi dima ani do Amin Tagi da manon gen tebaisi yoyiki. Gen uñuden da amin kindá aripmi dima añpulugogi. Uñun da amin mirak pañek nandanj uñun dakon butni pañupbal asak. <sup>15</sup> Gak pi aminsi dagok do pi tebaisi abi, añaki Pinjkop da pigo do nandaban tagisi asak. Yañ añek mayaktok dima pakdisal, ae Pinjkop dakon gen bami kilegisi yoyiñdetdisal. <sup>16</sup> Pinjkop dakon galak tok dima yolyoli dakon gen morap manji yobi. Gen uñuden da amin ilik pañpañ Pinjkop dakon kosit da dubagikonsi sigin pañkikdanj. <sup>17</sup> Gen uñuden uñun wuda yokwisi amin pañupbal añ uñun yombem, madepsi akdisak. Gen uñuden yoñ amin bamot uñun Imenius gat ae Piletus gat. <sup>18</sup> Amin bamot gen bami dakon kosit kili yipmanj dekgimal. Uñun yañ yomal, “Miñat amin morapyo kimoron da pidokdanj dakon bisap madep kili noman tagit.” Gen on nañ miñat aminyo diwari dakon nandanj gadat pañupbal amal. <sup>19</sup> Mani Pinjkop da

---

**2:12:** Mt 10.33    **2:13:** Ro 3.3-4; Tit 1.2    **2:14:** 1Ti 6.4; Tit 3.9    **2:15:** 1Ti 4.6    **2:16:** 1Ti 4.7    **2:17:** 1Ti 1.20    **2:19:** IDT 16.5; Ais 52.11; Jn 10.14; 1Ko 8.3

paŋmuwukbi madepni wasok do aŋek gwak teban kili magit da gwak uŋun tebaisi akdak. Ae uŋun gwagon gen yaŋ mandagit:

“Amin Tagi da iyi dakon miŋat amini nandanŋ yomisak,”  
ae

“Amin morap nin Amin Tagi dakon amin yaŋ yoŋ amin uŋun aŋpak yokwi uŋun manji yomiŋ kimotni.”

<sup>20</sup> Yoni morapmi amin da yutnon kwoba idapyo mibili mibili toŋ. Diwari gol ae silwa baŋ wasaŋbi, ae diwari kindap baŋ wasaŋbi, ae diwari miktim baŋ wasaŋbi. Uŋun kabikon diwari pi tagisi ak do toŋ, ae diwari pi isali mibili mibili ak do toŋ.

<sup>21</sup> Amin kinda egip egipnikon aŋpak yokwi wiririk mudaneŋ Piŋkop da dabilon gwaljiŋi mini asak kaŋ, uŋun amin idap kinda pi tagisi ak do tosok uŋun yombem. Uŋun Piŋkop dakon aminsi egek Amin Tagini tagi aŋpulugosak. Uŋun da pi tagisi morap ak do tagap tokdisak.

<sup>22</sup> Gak yawi kaluk da butgwan but suligik morap noman toŋ uŋun yopmaŋek pasal kini. Aŋek aŋpak kilegi gat, ae nandanŋ gadat gat, ae amin do but dasi galak taŋ yomyom gat, ae but yawot aŋpak gat uŋun timit do pi tebaisi abi. Aŋek amin Piŋkop da dabilon gwaljiŋi mini egek Amin Tagi da manon bisit aŋ amin gat on aŋpak tagisi morap aŋek egipni. <sup>23</sup> Gak nandanŋ kokwini tagi dima amin dakon gen gulusuŋni do mirak dima yopbi. Gaga nandisal, gen uŋuden da butjap ukwayityo paŋalon asak. <sup>24</sup> Amin Tagi dakon oman amin uŋun butjap ukwayityo dimasi asak. Amin morap kisi do aŋpak tagi baŋ anyomisak, ae yoyiŋdet agakni uŋun tagisi. Amin da kwen wigik aŋ iba kaŋ, aŋpak yaworisi anyomisak. <sup>25</sup> Uŋun pi yaworisi aŋek geni pabiŋ yopmaŋgaŋ amin dakon nandak nandakni paŋmilip asak. Yaŋ asak kaŋ, Piŋkop da paŋpulugaŋban

but tobil anjek gen bami do nandaŋ piŋoni. <sup>26</sup> Sunduk da galaktokni yolni do iyi da paron depban yokwalgwit. Mani gen bami nandani kaŋ, nandak nandakni ae piŋaŋakwa Sunduk da paron da kukwaŋ kikaŋ.

### 3

*Mibi* bisapmon amin da anpak yokwisi akdaŋ

<sup>1</sup> Mani yaŋsi nandaki, mibi bisapmon jigi morapmi yokwisi da noman tokdaŋ. <sup>2</sup> Amin da iyi dogin galak taŋek moneŋ timit do galagi madepsi nandakdaŋ. Iyi do nandaba yo madep anjakwa kwen wigik akdaŋ. Ae butjap ukwayityo anjek amin diwari yobipdaŋ. Meŋ datyo dakon gen pabiŋ yopdaŋ, ae miŋat aminyo da anpak tagi anjyoba ya yaŋ dima yoyikdaŋ. Piŋkop dakon anpak manji yomdaŋ. <sup>3</sup> Amin do but dasi galak taŋ yomyom anpak dima akdaŋ, ae amin da yokwi anjyoba diwari yopyop anpak dima akdaŋ. Amin diwari do yaŋba yokwi tok anjek giptim dakon galaktok kila tagi dima akdaŋ, anjek amin dapmaŋ paŋupbal akdaŋ. Anpak tagi morap uwal an yomdaŋ. <sup>4</sup> Iyi dakon notni yokwi an yomdaŋ, anjek nandak nandak gulusuŋ morapni tepmisi yoldaŋ. Unun iyi do amin madep yaŋ nandakdaŋ. On miktim dakon anpak kisik kisigi toŋ mibili mibili unun do galagisi nandaŋek Piŋkop do but dasi dima galaktokdaŋ. <sup>5</sup> Piŋkop dakon anpak ak do gip dagaŋ akdaŋ. Anjek Piŋkop da egip egipnikon pi asak dakon bikbik dima imdaŋ. Gak unuden amin da dubagikon egipbi.

<sup>6</sup> Unuden amin amin paŋkiligek yutnikon wigek miŋat paŋgalak anjek unun dakon galak tok yolni do pi an. Miŋat unun yokwi morapmi awit dakon jigi madepsi paŋek ekwaŋ. Ae but sulugik anjek yokwi mibili mibili an. <sup>7</sup> Miŋat

uñun nandak nandak pak do tagisi nandan, mani gen bami aripmi dima nandan pisoni. <sup>8</sup> Kalip Janes gat Jambres gat da Moses uwal an ingumal, yan gin, amin anpak uñun an uñun gen bami nan uwal an iman. Uñun nandak nandakni wagisi upbal tawit, ae Pin kop dimasi nandan gadan iman. <sup>9</sup> Mani pini uñun madepsi dima iren tokdisak. Uñun kalip amin da Janes gat ae Jambres gat dakon nugigi anpakni pindakgwit yan gin amin morap da anpakni pindakba nugigisi akdan.

*Timoti Pin kop gen tebaisi abidosak*

<sup>10</sup> Mani gak ni gen ban yoyindetdat, ae anpakno do nandisal. Mibili nido pi asat uñun nandisal. Nak Pin kop do tebaisi nandan gadanek bisapmi bisapmi butno tebaisi anteban anek pi asat, ae amin do but dasi galak tan yominek tebaisi agek but yaworon da jigi guramikdat. <sup>11</sup> Anpak yokwi morap amin da nak do aba jigi pagim, ae tepmi morap Antiok ae Ikoniam ae Lista kokup papmon naba guramikgim uñun gak nandisal. Mani Amin Tagi da uñun jigi morapmon nak anpuluganakwan tagisi egipgum. <sup>12</sup> Asisi, amin morap Yesu Kristo gat gadanek Pin kop dakon anpak ak do nandan, uñun aba amin da yo yokwi an yomdan. <sup>13</sup> Mani amin yokwi gat ae top amin gat da anpak yokwi sigin anakwa wagil yokwisi akdisak. Uñun minat aminyo pankewaldan, anakwa uñun yo kisi da tamoni do pankewaldan.

<sup>14</sup> Mani gak gen uñun abidagil da tebaisi nandan gadasal, uñun gen tebaisi abidoki, nido gayin dekgiman amin gaga nandan nimisal. <sup>15</sup> Gak moninisok egipgul bisapmon Pin kop dakon gen telagi papianikon ton nandak nandak unjudon wasanek pagil. Papia uñun da nandak



nandak kilegi tagi gamjak. Nandak nandak kilegi unun yan: Yesu Kristo nandan gadan iminaki Pinjkop da gak yokwikon nan abidosak. <sup>16</sup> Pinjkop da papiakon gen morap toj unun Telagi Wup da iyi amin panthagap aban mandawit. Gen unun da gen bami do niyindetdak, ae minat aminyo nandak nandak yokwini panmilip asak, ae kosit agip agipni panmilip asak, ae anpak kilegi do niyindetdak. <sup>17</sup> Gen unun da panpuluganban Pinjkop dakon minat aminyo nin anpak tagisi morap timikgiman, ae unun da panthagap aban pi tagisi morap mibili mibili ak do tagap toman.

## 4

### *Timoti unun Pinjkop gen yan tetjenok pi ankimotjak*

<sup>1</sup> Yesu Kristo da don altanek kila amin madep egek minat aminyo morap kalugi ekwan gat ae amin kili kimakgwit gat kisi dakon anpakni kokwin akdisak. Yanji akdisak, do nak Pinjkop ae Yesu Kristo da dabilon gak do gen tebaisi yan gayisat: <sup>2</sup> Gak geni yan tetjenok do pi tebaisi abi. Amin gen nandak do tagap tok an bo ae tagap toj dima an, gak bisapmi bisapmi Kristo dakon yan tetjenok dakon pi an kimokgi. Gak buri pidoni dakon gen ban madepsi yoyiki, ae but tobil anek Pinjkop dakon anpak yolni do panthagap abi. Gak bisapmi bisapmi minat aminyo dakon but panteban anek yaworikon da Pinjkop da anpak si galak tosok unun do tagisi yoyin dekgi. <sup>3</sup> Nido, don amin gen kilegi sanbenek nandak do dima galak tokdan. Unun da iyi ni gen ban nandak do galaktojan unun dakon yoyindetni iyi timitdan. <sup>4</sup> Unun gen bami manji iminek babikni dakon binap gen do mirak yopdan. <sup>5</sup> Mani gak gaga bisapmi bisapmi nandak nandakgo si pisanjakwan

egipbi. Jigi ae tepmiyo guramiki. Ae Gen Bin Tagisi miñat aminyokon yañ tenñeñok dakon pi abi. Miñat aminyo pañpulugoki dakon pi Piñkop da gamgut, pi uñun añ kimokgi.

*Pol* kilisok uñun kimotdisak

<sup>6</sup> Gak yañsi abi, nido nak kilisok uñun kimotdisat. Añapbo yawino da Piñkop do wain paret añ iman uñudeñ tagaldisat. Kikerñ dakon bisap kili kwanñ toso. <sup>7</sup> Nak egip egip dakon napbi gwapbo tagisikon timtim yañek kigim, añek abisok tilagon kili abiñ alat. Nak Piñkop do nandañ gadatno tebaisi abidagim. <sup>8</sup> Amin da napbi gwapbokon teban tañek tomni timikgañ uñun kili tagap tak da nak do jomañek toso. Tomni uñun yañ: Amin Tagi da amin kilegi yañ nayikdisak. Amin Tagi da añpak kilegi yolek amin dakon añpakni kokwin añek miñat aminyo gen pikon yopjak bisap madepmon tomni uñun namdisak. Ae nak kalon dogin ðima namdisak, amin morap Yesu noman altañban kok do but kindap añ uñun do kisi yomdisak.

*Timoti uñun Pol do tepmisi opjak*

<sup>9</sup> Gak kosit niañon da nagon tepmisi opbi dakon pi madepsi abi. <sup>10</sup> Nido, Demas kili nepmañ dekgit. Uñun on miktim dakon yo morap do galagi nandañek Tesalon-aika kokupmon kigit. Kresens uñun Galesia provinskon kinakwan Taitus uñun Dalnesia miktimon kigit. <sup>11</sup> Luk kalon dagin nak gat ekwamak. Mak abidañbi gak gat kisi opjil, nido uñun da nak pikon añpulugosak amin tagisi. <sup>12</sup> Tikikus uñun nak da yabekgo Epesas kili kigit.

<sup>13</sup> Gak apbi bisapmon paba pigik dubakno kokup pap Troas uñudon Kapus da yutnon yipgum uñun si abidañek

opbi. Ae papia kisi timikgi. Papia sipsip gip banj wasanbi unjun banjsi timikgi.

<sup>14</sup> Aleksanda, unjun ain banj yo wasok amin, unjun da nak do yo yokwisi agit. Unjun anpak agit dakon kobogi do Amin Tagi da yo yokwisi don anj imdisak. <sup>15</sup> Gakyo kisi unjun amin do kanj kimokgi. Unjun nin dakon gen do uwal madepis agit.

<sup>16</sup> Mibiltok gen pikon nepgwit dakon kobogi yagim bisapmon, amin kinda da nak gat agek anpuluganban gen dima yagimak. Amin morap kisi nak nepmanj dekgwit. Pinjkop da unjun gulusunni dakon kobogi yokwi dima yomjak dosi nandisat. <sup>17</sup> Mani, Amin Tagi da nak da ilenonjok agek nak anteban agit. Do nak Gen Bin Tagisi aripmisi yanapbo Amin Nwaktjwari Kabi morap kisi da nandawit. Anapbo Pinjkop da nak laion da gen kagakon nanj abidagit. <sup>18</sup> Amin Tagi da nak anpak yokwi morap anj namdanj unjudon nanj abidokdisak. Anjek anpuluganban tagisi egapbo ananj Pinjkop dakon amin kila agakni Kwen Kokup tosok unjudon anjikdisak. Amin Tagi dagok dagogi mini tilim gulgwani tanj ananj kikdisak. Unjun asi.

<sup>19</sup> Gildatno tagi Prisila gat ae Akwila gat ae Onesiporus dakon gwakni kisi do yoyiki. <sup>20</sup> Erastas unjun kokup pap Korinon sigin egisak. Anjakwan Tropimus unjun sot agit, do kokup pap Miletus unjudon yipmanj dekgim da egisak. <sup>21</sup> Gak kosit nianon da tepmisi opbi dakon pini ankimokgi. Jomjom anjegaki ais bisap di apban. Yubulus da gildatni tagi gayisak. Ae Pudens, ae Linus ae Klodia gat ae panmuwukbi diwari morap gat kisi da gildatni tagi gayan. <sup>22</sup> Amin Tagi da wupgo gat egipjak, ae nandanj yawotni da gagon tosok do bisit asat.

**PIŃKOP GEN**  
**The New Testament and Psalms in the Yopno Language of Papua**  
**New Guinea**  
**Nupela Testamen na Buk Song long tokples Yopno long Niugini**  
copyright © 2010 Wycliffe Bible Translators, Inc.

Language: Yopno

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-01-09

---

PDF generated using Haiola and XeLaTeX on 19 Oct 2021 from source files dated 17 Oct 2021

b683ce50-d820-5bfc-8471-d8ee080be106